

უკრაინის მართლმადიდებელი ეკლესიის ავტოკეფალიის ტომოსი

გურამ ლურსმანაშვილი

ქართულ მედიასივრცეში უკრაინის ეკლესიისადმი გადაცემული ტომოსის შესახებ მრავალგვარი და მათ შორის, სრულად უსაფუძვლო შეხედულებები ვრცელდება. დოკუმენტის განხილვა საკმაოდ ვრცლად, დეტალურად და მრავალგვარ ფორმატში შეიძლება. წინამდებარე თემაში შევეცდებით ძალიან მოკლედ გავამახვილოთ ყურადღება ტომოსში გადმოცემულ საკვანძო თემებზე, მათ შორის ტერმინებზე: „შვილი“ და „დედაეკლესია“, „მრონის მოხარშვა“, „აპელაციის უფლება“, „მიტროპოლიტის ტიტული“ და სხვ.

დასაწყისშივე ვიტყვი, რომ ნებისმიერი სახით, უკრაინის ავტოკეფალიაზე, როგორც „არასრულ“ ან „ნაკლოვა მოვლენაზე“ საუბარი სრულიად უადგილოა. ტომოსში¹ გარკვევით წერია: *„ჩვენ (ე.ი. მსოფლიო საპატრიარქო) გადავცემთ მას (ე.ი. უკრაინის ეკლესიას) პრივილეგიებსა და ყველა სუვერენულ უფლებას, რომელიც ეკუთვის ავტოკეფალურ საეკლესიო მმართველობას“*.

თუმცა, ყველა კითხვის ნიშანი რომ გავაქროთ, უფრო დეტალურად ჩავუღრმავდეთ ტექსტს. დავიწყოთ ტერმინებით – „დედა“ და „შვილი ეკლესია“. ტომოსში ვკითხულობთ: *„ვცნობთ და ვაცხადებთ უკრაინის ტერიტორიაზე ჩამოყალიბებულ ავტოკეფალურ ეკლესიას ჩვენს სულიერ შვილად და მოვუწოდებთ მსოფლიო მართლმადიდებელ ეკლესიებს, ცნონ იგი და-ეკლესიად“*. მოგეხსენებათ რომ, ბერძნული ენის სტრუქტურიდან გამომდინარე, ნებისმიერი სიტყვისათვის სქესის მისანიჭებლად აუცილებელია დავაკვირდეთ მის დაბოლოებას. როგორც წესი, „α“-ზე დაბოლოებული სიტყვები მდედრობითი სქესისაა, მათ შორის, ტერმინი

¹ ტომოსის ქართულენოვან თარგმანზე საუბრისას გამოვიყენებთ დავით ჩიკვაიძის მიერ შესრულებულ თარგმანს, <<http://www.tabula.ge/ge/story/142455-ra-tseria-ukrainis-avtokefaliis-tomosshi-qartuli-targmani>> [15.02.2019]

„ეკლესია“². შესაბამისად, ეკლესიათა შორის გარკვეული ურთიერთობების გამოსახატად, უძველესი დროიდან გამოიყენება ტერმინები „დედაეკლესია“ და ასევე, „დაეკლესია“, რადგან მდებარეობითი სქესის სიტყვაზე ვერ ვიტყვით მაგალითად ძმას ან მამას. რაც შეეხება თავად ამ ტერმინების ურთიერთმიმართებას, საეკლესიო სწავლების მიხედვით, ყველა ავტოკეფალური ეკლესია, ერთმანეთისთვის არის დაეკლესია, მაგრამ კონკრეტული ისტორიული ვითარების გათვალისწინებით ხშირი იყო, რომ ერთი ეკლესია მეორესთვის დედადაც იწოდებოდა, იქიდან გამომდინარე, რომ ამ კონკრეტულ ტერიტორიაზე სწორედ მან შეიტანა ან იზრუნა მართლმადიდებლობის გასაძლიერებლად. მაგ., ამ დრომდე, საქართველოს ეკლესიის დედაეკლესიად ითვლება ანტიოქიის ეკლესია,² რაც ნიშნავს რომ, საქართველოს ეკლესია ანტიოქიისთვის არის როგორც დაეკლესია, ასევე, შვილიეკლესიაც. ამ მოცემულობიდან გამომდინარე, არ უნდა გაგვიკვირდეს, რომ კონსტანტინოპოლისთვის უკრაინა არის შვილიეკლესია, ხოლო სხვათათვის დაეკლესია.

მეორე საკითხი, რომელსაც გვსურს შევხვით, არის მსოფლიო საპატრიარქოს „წინამძღოლობის“ თემა. ტომოსის ქართულენოვან თარგმანში ვკითხულობთ: *„უკრაინის ავტოკეფალური ეკლესია... აღიარებს უწმიდეს სამოციქულო და საპატრიარქო მსოფლიო საყდარს წინამძღოლად“*. დედანში³ ამ ადგილზე წინამძღოლის მაგივრად წერია – *„κεφαλῆν“* (თავი). ვნახოთ თუ რაზე მიგვითითებს ეს ადგილი.

უნდა ვაღიაროთ, რომ მართლმადიდებლურ სამყაროში საკმაოდ სერიოზული ეკლესიოლოგიური პრობლემები გვაქვს, რაც უმეტესად იმის გამოა, რომ რუსული იდეოლოგიური მანქანა

² იხ., საქართველოს უწმიდესი მართლმადიდებელი ეკლესიის ავტოკეფალიის ცნობისა და მტკიცების სიგელი.

³ იხ., ΠΑΤΡΙΑΡΧΙΚΟΣ ΚΑΙ ΣΥΝΟΔΙΚΟΣ ΤΟΜΟΣ ΧΟΡΗΓΗΣΕΩΣ ΑΥΤΟΚΕΦΑΛΟΥ ΕΚΚΛΗΣΙΑΣΤΙΚΟΥ ΚΑΘΕΣΤΩΤΟΣ ΕΙΣ ΤΗΝ ΕΝ ΟΥΚΡΑΝΙΑΙ ΟΡΘΟΔΟΞΟΝ ΕΚΚΛΗΣΙΑΝ.

აქტიურად ავრცელებს ე.წ. „პროტესტანტულ ეკლესიოლოგიას“,⁴ რომლის მიხედვითაც, გარეგნულად, თითოეული ავტოკეფალური ეკლესია არის ყველასა და ყველაფრისგან დამოუკიდებელი ერთეული, საერთო ჯამში კი, ვართ ეკლესიათა კონფედერაცია, რომელსაც არ ჰყავს ხელმძღვანელი, თავი. ესაა რუსული დსთ-ის საეკლესიო ვარიანტი: დამოუკიდებელ სახელმწიფოთა (ამ შემთხვევაში ეკლესიათა) თანამეგობრობა, მაგრამ ამ თანამეგობრობის კურსს განსაზღვრავს ის, ვისაც პოლიტიკურად ყველაზე მეტი ძალაუფლება აქვს, ე.ი. მოსკოვი. ამგვარი მიდგომით, მოსკოვის ეკლესია ახერხებს, რომ საერთაშორისო ასპარეზზე რიგი ეკლესიებისგან ისმოდეს ის, რაც მას სურს, ეკლესიებმა ბოიკოტი გამოუცხადონ იმას, რაც მას სურს, აღიარონ ან არაღიარონ ის, რაც მას სურს და ა.შ. ისმის კითხვა, რატომაა კონსტანტინოპოლი „თავი“. დავიწყეთ იმით, რომ მოთავეობა, პირველობა ან უპირატესობა, ეკლესიაში ყოველთვის და ყველგან სხვადასხვა ფორმით ხაზგასმული იყო. ეს მიდგომა ნაცნობი იყო პავლე მოციქულისთვის, სწორედ ამიტომ გვაქვს ე.წ. „პავლესეული ეკლესიოლოგია“, რომლის მიხედვითაც, სხეული შედგება მრავალი თავისუფალი და სრულუფლებიანი წევრისაგან (თავი, ხელი, ფეხი), მაგრამ თითოეულმა მათგანმა იცის, რომ მათ შორის უპირატესია თავი, ხოლო საკუთრივ თავი არის ამ ცალკეული დამოუკიდებელი და სრულუფლებიანი სხეულის ნაწილების ერთობის გარანტი, რადგან სხეულის ცალკეული ნაწილები თავის გარეშე ვერ ერთიანდებიან. არც ისაა შემთხვევითი, რომ სწორედ პეტრესა და პავლეს ეწოდებათ „მოციქულთა თავნი“ და არა წინამძღვარნი, სწორედ ზემოთდასახელებულიდან გამომდინარე, რომ თავია სხეულის ერთობის გარანტი. პავლეს ეკლესიოლოგია კარგად იყო ცნობილი ეგნატე ანტიოქიელისათვის, რომლის მიხედვითაც, ეპისკოპოსი არის ქრისტეს სახე და ევქარისტიული მსახურების ავთენტურობის გარანტი. უკვე შემდგომში, მსოფლიო

⁴ იხ., მღვდელ-მონაზონი ლეონიდე ებრალიძე, მართლმადიდებელ ეკლესიათა ოჯახი – მოსკოვური ეკლესიოლოგიის კრიზისი, <<https://www.palamacentre.com/2018/10/15/მართლმადიდებელ-ეკლესიათა-ოჯახი-მოსკოვური-ეკლესიოლოგიის-კრიზისი/>> [15.02.2019]

საეკლესიო კრებების მიერ მკაფიოდ განისაზღვრა ეკლესიათა შორის რიგითობისა და პრივილეგიების საკითხი, შესაბამისად, მივიღეთ სუბორდინაცია ეკლესიათა შორის. როგორც არ უნდა გვაფრთხობდეს ტერმინები – მოთავეობა, სუბორდინაცია, უპირატესობა და ა.შ., ფაქტია, რომ ეკლესიაში, თვით ადგილობრივ საეკლესიო ერთეულშიც, იგი ყოველთვის მკაფიოდ გამოიყოფოდა. საკითხზე საუბრისას, ასევე, არ უნდა დაგვაფიქრებდეს ე.წ. „პირველობათა დონეები“, ე.ი. არსებობს ადგილობრივი, რეგიონული და მსოფლიო დონეები, რომლებსაც საკუთარი „თავეები“ ჰყავთ, ხოლო თითოეული მათგანი, როგორც აღვნიშნეთ, ცალკეულ დონეზე ეკლესიის ერთობის გარანტები არიან (მაგ., საქართველოს პატრიარქი საქართველოს ეკლესიის მეთაური და მისი ადმინისტრაციული ერთობის გარანტია, – ეს ადგილობრივი დონეა). მსოფლიო პატრიარქის შემთხვევაში ვხვდებით სამივე დონის იერარქის უნიკალურ ერთობას: ადგილობრივი (ეპისკოპოსი კონსტანტინოპოლისა – ახლისა რომისა), რეგიონული – პატრიარქი და მსოფლიო - მსოფლიო პატრიარქი). უფრო მნიშვნელოვანია ის, რომ ეკლესიის ისტორიის მანძილზე ერთმნიშვნელოვნად დასტურდება მოცემულობა, რომლის მიხედვითაც, კონსტანტინოპოლის პატრიარქს არა მხოლოდ ტიტულატურაში ჰქონდა სამი დონის პირველობა, არამედ პრაქტიკაშიც წარმატებით იყენებდა მას. მაგ., აპელაციის უფლება, ავტოკეფალიის მინიჭების უფლება, ენდიმუსა კრება, სტავროპოიგიების დაარსება, კრების მოწვევის ინიციატორობა და ა.შ. როდესაც ამ ყველაფერზე ვსაუბრობთ, ავტომატურად ისმის ხოლმე კითხვა: კი მაგრამ, რატომ აქვს ეს უპირატესობები კონსტანტინოპოლის ეპისკოპოსს? განა ის არაა „პირველი თანასწორთა შორის“? რა თქმა უნდა, როგორც ეპისკოპოსი, ისიც და ნებისმიერი სხვაც თანასწორნი არიან, რადგან არსებობს - *"Primus Inter Pares"*, მაგრამ როგორც კონსტანტინოპოლის პატრიარქი, იგია – *"Primus Sine Paribus"* – პირველი თანასწორთა გარეშე.⁵

⁵ იხ., პრუსიის მიტროპოლიტი ელპიდოფოროს ლამბრიანიდიძის,

და ბოლოს, როდესაც მსოფლიო საპატრიარქოს უპირატესობაზე ვსაუბრობთ, ვილაც გვპასუხობს, რომ ჩვენ არ ვართ კათოლიკეები, რომელთაც ჰყავთ პაპი და რომ ვართ მართლმადიდებლები, რომლებსაც გვაქვს სინოდი (კრება). დიახ, ჩვენ არ გვყავს პაპი და გვაქვს კრება, თუმცა მოციქულთა 34-ე, ანტიოქიის მე-9 და მე-16 კანონთა მიხედვით, სინოდი უპირატესი იერარქის გარეშე არასრულყოფილია, ხოლო მსოფლიო დონეზე კი ეს უპირატესი იერარქი მსოფლიო პატრიარქია, რომელიც ადგილობრივ დონეზე კონსტანტინოპოლის ეპისკოპოსია.

კიდევ ერთი უმნიშვნელოვანესი საკითხი, რომელიც ჩვენს საზოგადოებაში მანიპულაციის საგნად იქცა, არის მირონი, რომელიც, ტომოსის ტექსტის შესაბამისად, უკრაინამ მსოფლიო საპატრიარქოსგან უნდა წაიღოს. პირდაპირ უნდა ვთქვათ, რომ არსებობს არაერთი ავტოკეფალური ეკლესია, რომელსაც მირონი კონსტანტინოპოლისგან მიაქვთ. უფრო მეტიც, დღეისათვის, თვით პრეზვიგენულ, იერუსალიმის უძველეს ეკლესიასაც მსოფლიო საპატრიარქოსგან მიაქვს მირონი და ვფიქრობთ, თუნდაც ეს ფაქტიც საკმარისია, რომ ამ საკითხზე ერთხელ და სამუდამოდ შეწყდეს სიცრუის ტირაჟირება.

მსგავსი საკითხი, რომელიც, ასევე, ხშირად ხდება მანიპულაციის თემა, ეს ეკლესიის მეთაურის სტატუსია. ტომოსში ვკითხულობთ, რომ უკრაინის ეკლესიის მეთაურს ეწოდება: „*უნეტარესი მიტროპოლიტი კიევისა და სრულიად უკრაინისა*“. ვერ გეტყვით რატომ გახდა ეს თემა ასეთი აჟიოტაჟის საგანი, მაშინ, როდესაც მარტივად შეიძლებოდა უბრალოდ გვენახა მართლმადიდებელ ეკლესიათა დიპტიქი და დავრწმუნდებოდით, რომ მხოლოდ უკრაინას კი არა, ასევე, კვიპროსის, საბერძნეთის, პოლონეთის, ალბანეთის და ჩეხეთ-სლოვაკეთის ეკლესიებსაც კი არ ჰყავთ პატრიარქები და ისინი, ვინც უკრაინის ეკლესიის მეთაურისადმი მიტროპოლიტის წოდებით არ კმაცოფილდებიან,

ალბათ მოვალენი არიან, იგივე შეფასებები გამოთქვან ზემოთქმული ეკლესიების შესახებ.

ძალიან მნიშვნელოვანია, ასევე, ნათლად განვმარტოთ ტომოსში დაფიქსირებული ე.წ. „აპელაციის უფლება“, რომლის მიხედვითაც, სხვადასხვა სახის დოგმატურ თუ კანონიკურ საკითხებზე წამოჭრილი პრობლემების დროს, თუკი მიმართავს უკრაინა მსოფლიო საყდარს, ამ შემთხვევაში, ამ უკანასკნელმა უნდა გამოიყენოს საკუთარი პრივილეგიები და უკრაინის ეკლესიას პრობლემების მოგვარებაში დაეხმაროს. აქვე უნდა განვმარტოთ, რომ მსოფლიო კრების დადგენილებათა და ისტორიულ რეალობათა შესაბამისად, მსოფლიო საპატრიარქოს უფლება აქვს არათუ საკუთარ შვილეკლესიასთან, არამედ საერთოდ სხვა იურისდიქციასთან დაკავშირებითაც გამოიყენოს აპელაციის უფლება. მაგ., მეოთხე მსოფლიო კრება მეცხრე კანონით განაჩინებს: *„თუ კლერიკოსს თავის, ან სხვა ეპარქიის ეპისკოპოსთან აქვს სამართლებრივი დავა, მაშინ სამთავროს კრებამ გადანყვიტოს; ხოლო თუ მიტროპოლიტის უკმაყოფილო იქნება ეპისკოპოსი ან კლერიკოსი, მაშინ დიდი სამთავროს ეგ ზარქოსს მიმართოს, ან კონსტანტინოპოლის სამეუფო საყდარს და მის წინაშე გასამართლდეს“* (IV. 9) ამავე კრების მეჩვიდმეტე კანონის მიხედვით კი: *„ვინც თავისი მიტროპოლიტის მხრიდან დაიჩაგრება, შეუძლია მიმართოს დიდი სამთავროს ეგ ზარქოსის, ანდა კონსტანტინოპოლის საყდრის სამსჯავროს“*. (IV. 17). ზემოთქმული ცოტა ხნით საერთოდ რომ გვერდზე გადავდოთ, მოგეხსენებათ, უკრაინის ეკლესიის გაერთიანება მსოფლიო საყდრის სწორედ ამ უფლებიდან გამომდინარე მოხდა, როდესაც მიტროპოლიტები ფილარეტ დენისენკო და მაკარი მალეტიჩი საეკლესიო სისავსეს დაუბრუნდნენ⁶ და თავად განსაჯეთ, როგორი უსამართლობა და შეუსაბამობა იქნება, რომ ის უფლება არ იყოს აღნიშნული ტომოსში, რომლითაც ეკლესია გაერთიანდა.

⁶ იხ., კონსტანტინოპოლის მსოფლიოს საპატრიარქოს წმინდა სინოდის განჩინება, 2018 წლის 9 ოქტომბერი, <<https://www.palamacentre.com/2018/10/11/კონსტანტინოპოლის-მსოფლიოს-საპატრიარქოს-წმინდა-სინოდის-განჩინება/>> [15.02.2019]

დასკვნითი თემა, რომელზეც გვსურს, რომ გესაუბროთ, არის დიასპორის საკითხი, რომელმაც, ასევე, დიდი აწიოტაჟი გამოიწვია ქართულ სივრცეში. ტომოსში ვკითხულობთ: „*კიევის სამიტროპოლიტოს* არ აქვს უფლება, დაადგინოს ეპისკოპოსები ან დააფუძნოს სამრევლოები ქვეყნის ფარგლებს გარეთ; ამჟამად უკვე არსებული კი დაექვემდებარებიან, თანახმად განწყობისა, მსოფლიო საყდარს, რომელსაც აქვს კანონიკური უფლებამოსილება დიასპორაში“. ბევრმა შეიძლება არც იცის, რომ 1990 წელს კანადის უკრაინული ეკლესია მსოფლიო საპატრიარქომ თავის იურისდიქციაში მიიღო, ხოლო 1995 წელს აშშ-ის და დანარჩენ ქვეყნებში განფენილი უკრაინული დიასპორული ეკლესიებიც ავტონომიის უფლებით შეუერთდნენ მსოფლიო საპატრიარქოს. ამ ამბებიდან ცოტა ხნის გასვლის შემდეგ, მსოფლიო საპატრიარქომ სწორედ ამ დიასპორულ ეპარქიებში მყოფი ეპისკოპოსები მიაგვლინა ეგზარქოსებად უკრაინაში, რათა ავტოკეფალიის თემა გადაეჭრათ და გადაჭრეს კიდევ.

ახლა საეკლესიო სამართალი ვნახოთ რას გვეუბნება. პირველი მსოფლიო კრება კანონით იმპერატიულად ადგენს, რომ „ერთ ქალაქში კი ორი ეპისკოპოსი არ უნდა იყოს“. (I მსოფ. 8) ხოლო მეოთხე მსოფლიო კრების 28-ე კანონის მიხედვით, იმ ტერიტორიებს, სადაც არაა ჩამოყალიბებული დამოუკიდებელი ეკლესია, კანონიკურად განაგებს კონსტანტინოპოლი. ზოგადად, აუცილებელია აღვნიშნოთ, რომ დიასპორა XX-XXI საუკუნის ერესია, რომელიც რუსეთის გამოისობით შემოვიდა მართლმადიდებლობაში, ამ კანონიკური აბსურდის მეტ-ნაკლებად მოსაწესრიგებლად, მსოფლიო საპატრიარქომ დიასპორაში შექმნა ე.წ. „საეპისკოპოსო საბჭოები“, რომლებშიც კონკრეტულ ტერიტორიაზე მოღვაწე მართლმადიდებელი ეპისკოპოსები გაერთიანდნენ და რომელსაც მსოფლიო საპატრიარქოს ეპისკოპოსი ხელძღვანელობს, ხოლო იგივე ეკლესია, ახალ ავტოკეფალურ ეკლესიებს კი სთხოვს, რომ დაიცვას მსოფლიო კრებათა კანონები. ვილაცას ეს შეიძლება არ მოსწონდეს, მაგრამ რადგან არც I მს. კრების მე-8 და არც IV მს. კრების 28-ე კანონი არ გაუუქმებია არცერთ

მსოფლიო კრებას, შესაბამისად, ვერავინ შეედავება მსოფლიო საპატრიარქოს კანონიკური ნორმების დარღვევაში.

უფრო მეტიც, **14** ავტოკეფალური ეკლესიიდან, ალექსანდრიის, იერუსალიმის, კვიპროსის, საბერძნეთის, ჩეხეთ-სლოვაკეთის, პოლონეთისა და ალბანეთის ეკლესიებს საერთოდ არ აქვთ დიასპორული ეკლესიები, შესაბამისად, თუ ვინმე ამ კრიტერიუმით საზღვრავს უკრაინის ეკლესიის დამოუკიდებლობას, მაშინ ზემოთჩამოთვლილი ეკლესიების შესახებაც იგივე უნდა განაცხადოს.

ამგვარად, მიმოვიხილეთ ის ძირითადი საკითხები რომლებიც ტომოსშია გადმოცემული და სხვადასხვა არგუმენტზე დაყრდნობით განვიხილეთ, თუ რეალურად რა და რატომ წერია დასახელებულ დოკუმენტში. იმედია, შეძლებისდაგვარად მოკლედ და სრულად გადმოვეცით ჩვენი თემის ძირითადი სათქმელი, რომ უსაფუძვლო და ცილისმწამებლურია ნებისმიერი განცხადება თუ შეფასება, რომელიც უკრაინის უწმინდესი ეკლესიის ავტოკეფალიისა და დამოუკიდებლობის რაიმე მხრივ დაკნინებას მიემართება.